

汝之言乎云云今昌潤身故輸租一款雖無究問之處而昌潤為黃海水使時與鳧津縣令申混有世所共知之嫌龍祚在臺果有彈劾申混之事以此推之虎龍所言實有根據所謂外影論其情犯比之三手諸凶或不無內外深淺之別而所可痛者名為人主之耳目實作凶黨之外援望風承意如影逐形左搏右噬惟其指使到今諸賊伏法之後外影和應之輩不可不次第嚴懲鎮商以他犯投諸極邊而龍祚則所犯尤著請極邊安置又 啓曰龍川府使任勗緊出於虎龍洽面質時招辭有曰以銀二百兩給天紀求仕於願命而又不得官直欲舉願命名字呈狀於京兆之意恐喝天紀故天紀不得已居間周旋終差龍川府使云勗與逆輩親昵交通貨賂之狀舉此可知請遠地定配並不從

○丁巳 王世弟如館所送清使是勅也戶曹密贈銀合五千一百兩例贈及他物不與焉○配徐命伯于靈巖郡德修父也用減死律竄趙尚綱于安州金濟謙于富寧配柳慶裕于茂長○戊午夜三更四更乾方坤方有氣如火光○狗入敦化門○己未賞賜陳奏兼奏請使正使以下有差政院 啓請寢健命田民賜給之 命不許○憲府持平趙翼命申前啓新 啓請寢健命賞賜並不從先是掌令李景說以三臺臣處置乖當物議為非引避正言鄭壽期以禁堂